

## Tabell B-k

### Inntektsgarantiordning. Kommunane

Inntektsgarantiordninga (INGAR) skal sikre at ingen kommunar har ein berekna vekst i rammetilskotet frå eit år til det neste som er lågare enn 300 kroner per innbyggjar under berekna vekst på landsbasis, før finansieringa av sjølve ordninga. Ordninga blir finansiert ved eit likt trekk per innbyggjar frå alle kommunar.

Inntektsgarantiordninga ser på den totale endringa i rammetilskotet. Kommunar med låg vekst i rammetilskotet vil med INGAR få kompensasjon uavhengig av om den låge veksten skuldast innlemming av øyremerkte tilskot, systemendringar, nedgang i folketalet, endringar i regionalpolitiske tilskot, endringar i kriteriedata eller andre forhold.

Endringar i inntektsutjamnande trekk/tilskot som følgje av endra skatteutjamning eller skatteinngang blir ikkje kompensert gjennom inntektsgarantiordninga. Endringar i skjønstilskotet, veksttilskotet eller saker med særskild fordeling (tabell C-k) blir heller ikkje kompensert gjennom INGAR, sidan dette er tilskot som blir gjeve til særskilde formål eller i ein tidsavgrensa periode.

Kommunar som slår seg saman får kompensasjon for bortfall av inntekter som følgje av samanslåinga. Kompensasjonen gjeld bortfall av basistilskot, regionalpolitiske tilskot og eventuelle meirkostnader som følgje av auka arbeidsgjevaravgift. Kompensasjonen blir i sin heilskap gjeve gjennom inndelingstilskotet, og vil også inngå i grunnlaget for berekning av inntektsgarantiordninga i inntektssystemet. Kommunar som slår seg saman får dermed ikkje kompensasjon både gjennom inndelingstilskotet og INGAR.

Inntektsgarantiordninga for 2017 blir berekna med utgangspunkt i rammetilskotet til kommunane etter revidert nasjonalbudsjett 2016. Dette rammetilskotet blir korrigert for skjønstilskot i 2016, saker med særskild fordeling i 2016 (saker i tabell C-k) med unntak av inndelingstilskotet, veksttilskotet i 2016, korreksjonar og inngåande fordeling av tilskot som blir innlemma i inntektssystemet i 2017. Rammetilskotet til kommunane i 2017 blir korrigert tilsvarande for skjønstilskot i 2017, saker med særskild fordeling i 2017 med unntak av inndelingstilskotet og veksttilskotet i 2016. Deretter blir den korrigerede veksten frå 2016 til 2017 berekna, på landsbasis og for kvar einskild kommune.

Den korrigerede veksten på landsbasis frå 2016 til 2017 er på 729 kroner per innbyggjar. Dersom ein kommune har ein korrigert vekst i rammetilskotet som er lågare enn 429 kroner per innbyggjar, får kommunen tilskot gjennom inntektsgarantiordninga tilsvarande differansen mellom eigen vekst i rammetilskotet, og ein vekst på 429 kroner per innbyggjar. I tillegg må alle kommunar vere med å finansiere INGAR gjennom eit trekk i innbyggjartilskotet. I 2017 utgjer finansieringa 100,9 kroner per innbyggjar. INGAR blir berekna på grunnlag av innbyggjartal per 1. juli 2016.

### Kolonne 1 – Rammetilskot 2016

Kolonne 1 viser rammetilskot til kommunane etter revidert nasjonalbudsjett 2016, eksklusive ufordelt skjønn.

## Kolonne 2 – Skjønstilskot 2016

Kolonne 2 viser skjønsmidlar fordelt av fylkesmannen og skjønsmidlar fordelt av Kommunal- og moderniseringsdepartementet som kompensasjon for endringane i inntektssystemet i 2011, for 2016. Kolonnen inneheld ikkje ufordelte skjønsmidlar m.m. Skjønstilskot inngår ikkje i berekninga av inntektsgarantiordninga, og må trekkjast ut av rammetilskotet for 2016 i berekninga av INGAR.

## Kolonne 3 – Saker med særskild fordeling 2016

Kolonne 3 viser fordelinga av sju enkeltsaker med særskild fordeling i 2016. Fordelinga i kolonnen er ytterlegare dokumentert i tabell C-k i Grønt hefte 2016 og i rundskrivna H-1/16 og H-7/16 frå Kommunal- og moderniseringsdepartementet.

## Kolonne 4 – Veksttilskot 2016

Kolonne 4 viser veksttilskotet i 2016. Tilskotet er dokumentert i tabell D-k i Grønt hefte 2016.

## Kolonne 5 – Inndelingstilskot 2016

Kolonne 5 viser inndelingstilskotet i 2016. Tilskotet er ein del av saker med særskilt fordeling (kolonne 3), som blir halde utanfor berekninga av inntektsgarantiordninga. Inndelingstilskotet blir difor lagt til i berekninga av inntektsgarantiordninga, etter at saker med særskild fordeling er trekt frå.

## Kolonne 6 – Summen av innlemmingar og korreksjonar i 2017

Kolonne 6 viser summen av endringar i rammetilskotet i 2017 som det blir korrigert for i berekninga av inntektsgarantiordninga for 2017. Korreksjonane er fordelt etter kostnadsnøkkelen.

Tabellen under gjev ei oversikt over dei ulike sakene det blir korrigert for i 2017. Merk at beløpa i tabellen under er i 2016-kroner. Sjå Prop. 1 S (2015–2016) frå Kommunal- og moderniseringsdepartementet for ein nærare omtale av sakene rammetilskotet er korrigert for.

| <b>Innlemmingar og korreksjonar i 2017<br/>(beløp i 2016-kroner)</b>              | <b>(1000 kr)</b> |
|---|------------------|
| <i>Innlemmingar</i>   |                  |
| Bustadsosialt kompetansetilskot   | 5 561            |
| Bustadsosiale tilskot   | 9 800            |
| <i>Korreksjonar</i>   |                  |
| IKT-modernisering i Husbanken (SIKT)  | 11 200           |
| Bevilling valdirektorat   | 12 500           |
| Auke i elevtal statlege og private skular   | -108 293         |
| Ny naturfagstime, heilårseffekt   | 111 578          |
| Gratis kjernetid i barnehage for 3-åringar, heilårseffekt                         | 28 000           |
| Augeblikkeleg hjelp rus og psykiatri  | 84 390           |
| Aktivitetsplikt for mottakarar av sosialhjelp                                     | 58 537           |
| Avvikling av diagnoselista for fysioterapi  | -170 732         |
| Auke i kommunale utgifter til barnehage som følge av botidskrav for kontantstøtte | 1 951            |
| Momskompensasjon for sameiger   | -34 146          |
| <b>Sum endringar</b>  | <b>10 346</b>    |

## **Kolonne 7 – Diverse korreksjonar**

### *Korreksjon for feil i kriteriedata i 2016*

Rammetilskotet for Østre Toten kommune i 2016 er korrigerert for ein feil i kriteriedata i 2016. På grunn av denne feilen er rammetilskotet til kommunen for høgt i 2016, og at denne feilen blir retta opp i 2017 skal ikkje utløyse tilskot gjennom inntektsgarantiordninga i 2017.

### *Korreksjon for nedtrapping av inndelingstilskotet*

Re kommune har mottatt inndelingstilskot i 15 år, og tilskotet skal trappast ned i 2017. Dette skal ikkje påverke inntektsgarantiordninga i 2017, og rammetilskotet til Re kommune blir korrigerert for endringa i inndelingstilskot frå 2016 til 2017.

### *Korreksjon for grenseendring*

Sandefjord, Andebu og Stokke kommunar slår seg saman til ein kommune frå og med 2017. Samtidig blir det gjennomført ei grenseendring mellom nye Sandefjord kommune og Tønsberg kommune. Ein del av tidlegare Stokke kommune blir flytta til Tønsberg kommune, totalt utgjer dette om lag 2 200 innbyggjarar. Grenseendringa skal ikkje påverke inntektsgarantiordninga, og rammetilskota til Sandefjord og Tønsberg kommune i 2016 er korrigerert for denne endringa.

## **Kolonne 8 – Korrigerert rammetilskot 2016**

Kolonne 8 viser korrigerert rammetilskot for 2016. Kolonnen er kolonne 1 trekt frå kolonnane 2–4, pluss kolonnane 5–7. Kolonnen er grunnlaget for berekning av absolutt korrigerert vekst frå 2016 til 2017.

## **Kolonne 9 – Rammetilskot 2017 (før INGAR)**

Kolonne 9 viser rammetilskot til kommunane i 2017, eksklusive ufordelt skjøn, før utrekning av inntektsgarantiordninga.

## **Kolonne 10 – Skjønstilskot 2017**

Kolonne 10 viser skjøn fordelt av fylkesmannen (jf. tabell 1-k, kol. 6). Kolonnen inneheld ikkje ufordelt skjøn m.m. Skjønstilskot inngår ikkje i utrekninga av inntektsgarantiordninga, og må trekkjast ut av rammetilskotet for 2017 i berekninga av INGAR.

## **Kolonne 11 – Saker med særskild fordeling 2017**

Kolonne 11 viser fordelinga av ni enkeltsaker med særskild fordeling. Saker som ligg i tabell C-k skal ikkje inngå i utrekninga av inntektsgarantiordninga, og rammetilskotet for 2017 må korrigerast for dette. Fordelinga i kolonne 11 er ytterlegare dokumentert i tabell C-k.

## **Kolonne 12 – Veksttilskot 2017**

Kolonne 12 viser veksttilskotet i 2017 (jf. tabell 1-k, kol. 4). Veksttilskotet inngår ikkje i inntektsgarantiordninga, og må korrigerast ut av rammetilskotet for 2017 før utrekninga av ordninga.

## **Kolonne 13 – Inndelingstilskot 2017**

Kolonne 13 viser inndelingstilskotet i 2017. Tilskotet er ein del av saker med særskilt fordeling (kolonne 11), som blir halde utanfor utrekninga av inntektsgarantiordninga.

Inndelingstilskotet blir difor lagt til i berekninga av inntektsgarantiordninga, etter at saker med særskild fordeling er trekt frå.

#### **Kolonne 14 – Korrigert rammetilskot 2017**

Kolonne 14 viser rammetilskotet til kommunane i 2017, korrigert for skjønstilskot i 2017, saker med særskilt fordeling i 2017, veksttilskot i 2017 og inndelingstilskot i 2017. Kolonnen er kolonne 9 minus kolonnane 10–12, pluss kolonne 13.

#### **Kolonne 15 – Absolutt korrigert vekst 2016–2017 (i 1000 kr)**

Kolonne 15 viser absolutt korrigert vekst i rammetilskotet til kommunane frå 2016 til 2017. Veksten er vist i 1000 kroner. Kolonnen er kolonne 14 minus kolonne 8.

#### **Kolonne 16 – Absolutt korrigert vekst 2016–2017 (kr per innb.)**

Kolonne 16 viser absolutt korrigert vekst i rammetilskotet til kommunane frå 2016 til 2017. Veksten er vist i kroner per innbyggjar, og er berekna med utgangspunkt i innbyggjartal per 1. juli 2016. Gjennomsnittleg vekst på landsbasis er 729 kroner per innbyggjar. Det gjev ei vekstgrense for å få tilskot gjennom inntektsgarantiordning i 2017 på 429 kroner per innbyggjar ( $729 - 300 = 429$ ).

#### **Kolonne 17 – Inntektsgarantiordning før finansiering (kr per innb.)**

Kolonne 17 viser inntektsgarantiordninga for 2017 i kroner per innbyggjar, før finansiering av sjølve ordninga. Kommunar som har ein vekst i rammetilskotet (absolutt korrigert vekst) som er lågare enn 429 kroner per innbyggjar blir kompensert opp til denne vekstgrensa.

#### **Kolonne 18 – Inntektsgarantiordning 2017 (kr per innb.)**

Kolonne 18 viser nettoeffekten av inntektsgarantiordninga i kroner per innbyggjar, altså INGAR inkludert finansiering. Sidan INGAR er ei omfordelingsordning, er alle kommunane med på å finansiere tilskotet med eit likt beløp per innbyggjar. I 2017 er finansieringa 100,9 kroner per innbyggjar

#### **Kolonne 19 – Inntektsgarantiordning 2017 (i 1000 kr)**

Kolonne 19 viser inntektsgarantiordninga i 2017 i 1000 kroner. Kolonnen er lik kolonne 18 multiplisert med innbyggjartal per 1. juli 2016 (sjå tabell F-k, kolonne 2). Talet på inntektsgarantiordninga blir nytta vidare i tabell 2-k, kolonne 5.